

近代詩鈔

二十

近代詩集

十

近代詩鈔

夏敬觀

敬觀字劍丞江西新建人光緒甲午舉人官浙江教育廳長有快盦詩存

石遺室詩話李拔可有詩友二人曰夏劍丞曰諸真長介以識余有年矣真長蹤跡稍疏詩不多見惟記哀邁過恕齋故居二作審曲面勢善使逆筆去年屬拔可代覓其詩則皆造語用意能透過一層者惜其太少而真長以爲得此已足若必求益則賣菜傭所爲已劍丞爲皮鹿門高足今之學人於詩尤刻意鍛鍊不肯作一猶人語視其鄉人高伯足陳散原未知其徐行後長者否也余嘗題其詩稿云命詞薛浪語命筆梅宛陵散原實

兼之君乃與代興蓋喜其能自樹立不隨流俗爲轉移
耳

園中暮春

十丈春陰搏桂葉一籬疏雨養薔薇無人識得柯亭竹斫取新
篁抱筍歸

拔可新宅白籐花

我言覆籐須作廊君言籐宜屋爲架塗髹漫聖有何好不如白
花似銀研鄰家種籐數百步宛枝長虹紆可跨春風曾不強分
別一樣開完始休罷我疑屋中君坐臥外有束縛寧不怕君方
治酒召賓客曰今花開我方暇不愁風雨使齏粉落在當階猶
足藉北園有地三畝餘千萬買鄰休論價我言喜謔君莫惱君
出每晨歸必夜歸來秉燭看此花脂面吳姬妨妒罵

晚步塘上歸臥作

殘日沒波作秋味萬道斜光畫雲氣海山沈沈入夜冥挂眼天
空萬星沸鄰家鬪鴨傍南牆水底影追鴻雁行三更呼名人不
解蛙唱蟲吟夢一牀

秋夜述懷

暑短得涼早秋味已分半夜索簷牙聲風滿櫺葉戰露氣滌吾
骨星色嘆吾面置之星露底皎皎眞質見南塘水波冷割此一
匹練蘆花散爲餌薄與鷗鷺嚙比鄰鵝鴨闌曖曖夕陽眷物意
自冷暖天賦各貴賤

金陵江頭送客旅樓曠望

風幕連城闕山花墮酒杯雲光翦天出舟影截潮來望望歷陽
樹濛濛歌吹臺橫江萬里客眼向北樓開

登項羽繫馬臺

項羽都彭城自失帝王基勇勝而無學不足與有爲一挫喪其身山澤橫涕洟戰地不戰力屈殺江東兒十月朔風勁我登繫馬臺黃雲浣城郭下見百尺埃誰持青霜劍摧石如撥灰芒碭大澤間雄氣盡一時此邦四戰地胡馬頻來窺戎兵數百年文物皆南移河流水爲患河去地益疲饑則生盜賊惡水窮山啗不聞雍門琴寂寞深古悲

用前韻貽李梅庵

梅庵作書技稱絕點畫直造古人拙有時畫水還畫松墨花着紙磨不滅北極山氣朝入脣噓出一片天光新齋鐘徹河五里潤聖手去作傳薪人

滬上喜見陳子言時將往粵以詩阻之

朝從江上來暮咽海氣冷厭見鐙火喧短檠照孤哽凍手瀝肝
膽呵氣壁有影癯癯鶴柴人凝眼秋骨警出我懷中詩見之色
邴邴吾曹舌已僵張吻疾求茗艱苦陳數語有類瘖人請口含
貫休吃喉藏汲黯鯁鬱茲中腸熱辨貌轉凉洗舉世譏譏然溝
壑亂蛙黽上有鷹隼怒下有犬聲獷饑涎擇肥噬不慕此瘦瘠
再君寧滬中魚母爲逸海嶺憂歌縱干忌睡耳實不醒矧吾擁
腫木言出若瘤癭誓缺羈馬銜同握汲古綆

輓陳於勤

陳生任俠虎豹姿常持一箠天下馳學書學劍萬人敵飛箱智
術胸中奇南人駛船如駛馬空灘夜雨心不疑懷提鉛槧歷要
害濺灑海石窮山觜飛鴻在天杯在手胡女舞飲春傲傲偶然
治島若御國片語折獄民歌詩斗衡剖折蒙吏語剽剝儒墨無

焚瀛強鄰假道正伐虢海水晝立旋風吹親探泥丸入虎穴變
服得睨秦人雌華元登牀功不錄排娼衆態良足嗤穆生在楚
不設醴王戊意怠機已危去之琅琊作扞衛邑鬱蝨處夫何爲
田橫已死國士盡賓客慕義咸涕洟祇今櫬槨出頑焰后意欲
寵蚩尤旗彌天戢棺有深痛絕好身手空牲犧

贈陶駿保時爲憲兵司令官雅善音樂

雍容幕下陶司令白馬花袍美少年早使諸軍稱魯肅果能狹
道死龐涓聽宮考角吾知懼崇禹生開世不傳猶有饒歌稱曲
部看君飛騎漢營前

拔可築樓於城北旁植竹木大可二畝自居其家於通州
而以樓假予作此謝之

城中二畝宅大可納宇宙九月菊氣盛籬援苦刻繡西風除黃

葉一夕林木瘦稍覺霧爲壁杲日出而耨平野度秋氣無隙不
穿透開屏負鍾峻捲幔見江岫豈求數仞堂但令心不陋謂宜
詩人居李子於吾厚

焦山放歌

楊瀾吹漂一千里六龍負波日加篷中有石柱根自深誰謂江
清能見底九秋風日弄浮媚我攜二客一舟艤曉鐘出林葉有
聲清梵穿堂石生耳博山當窗香茱萸北固諸峯羅案几砦西
羽化不知紀拄錫招之鶴可起東峯雀糞白佛頭攀籐上巢握
鷹子層巔四望紺宇空指畫江山若伸紙烹茶對江朝至夕枕
閣聽潮急篙矢散歸寺門燈火盡市樓頻向西欄倚七年五至
四不渡每望仙鬟暮煙裏美人娟娟臥秋水青蒼者天覆以被
吾家小姑無對值靚飾重簾差可擬

自題詩卷

好古肝腸世所憎空鑪無火伴書燈鑒窗市語聲初盡傾几梅
花冷可凭海水入詩生夜雪茶漚注硯作堅冰苦吟縱與年俱
進那及緣愁白髮增

除日雪晴寄伯嚴

一白真銷大地塵曉晴便見雪精神江湖已露開年意草莽相
看隔世人萬事破除端不易小詩更始務求新公才未分謳歌
老南史書元正待春

鄧尉山四古柏行

艤舟入山方二月野梅倚天亂飄白春寒社樹不吐青衆香惟
擁數株柏一柏晝吟風露聲一柏夜嘖山谷平一柏束虬天際
直一柏蒼龍地上行欹眠偃立皆有致氣骨閱世彌老成旁侍

諸孫色可喜修能未足內充美封胡羯末在一家天壤王郎慚
不似先皇品題恩寵渥春膏被野翠衣醺崇臺無梁未與致不
強夷齊食周粟五松對此發愧顏四皓方之遜高躅我來日午
坐其下已後齋鐘噉僧粥心知不朽乃正氣力戒樵斤禁鋤斲

書夢

春江如雷鳴窗下聽雨歇移燈向牀幃入夢化爲月

鄭太夷五十海藏樓落成詩以壽之

七閩多奇彥海藏人中龍五十客春申始有一畝宮歸然妙構
造上覆青蒼穹聖以太素色不與華屋同四旁敷芬葩六窗貫
晴虹君時撚吟髭哦詩聲摩空呼吸通海氣夢寐結秋嵩所志
洵俶儻此室常虛冲梅櫻幾開謝年少歌春風舊狂或回施玉
面今稱翁君詩且自哀頗歎虞翻窮收身居東海位置憑天公

茲語殆知命意與萬古雄因思抱書史老耄或相從春渚織溪
毛殘錦尚可縫庶求久視術毋爲去歡悰

暮宿駐馬店

五日渡一水十日越一山一生車馬上甯不歌路難而今無此
苦萬里真等閒南蔬辦晨饌北魚就晚餐聊題駐馬店一辰期
往還落日射流塵汴洛色未殘想見扶桑月正掛黃流間

偕朱漚尹李惜誦訪趙堯生楊昀谷徐匯寓廬不遇閱日
堯生昀谷與胡鐵華聯句約游龍華寺觀桃花雨阻不

往和答一篇

殘花披雨若兵過白髮彌愁春事左蜂逃蝶匿色可憐誰能載
酒強相賀詩來期約苦不踐夜窗再展眇昏破東坡山谷有家
法更喜少游珠玉唾吾曹所穫在苦吟苛稅幸免詩人課寒蒨

得蛭咀貧味切莫籜龍冤殺今日昨造門未裹飯但覩枯茶生
壞銼心念主人竟何適止此久如氈耐坐峨眉險巖不易上朱
霞雲堂路亦珂避人東海良暫安合眼還家夢頻作會當同爨
煮舊字甘讓市兒呼醋馱日投一詩亦不惡勝遣吟腸輒啼餓
空腔悉索持送似報餉還期迭爲和

壬子四月送婦弟奉母至潯陽別去明日予渡鄱陽湖過
姑塘八里許石磯覩鑒弟沈舟處痛絕復蘇旣抵南昌
久之追寫九十字以紀予哀

喪婦百廿日但覺事事非寢興久無節辰出亥始歸朋友勸強
顏面從心與違亦復厭見我嗔我終日欷惟可語婦家百語百
痛憶一朝別歧路守雁真孤飛淒風鬻湖船往渡姑塘磯甯知
後死兄去死亦幾希頽魂厭皮骨久絕復來依

謁墓

孟夏涉墓門山木蔭已老手植拱把枝今茲各環抱去里逾十年匍匐告皇考衣冠易初制野服照塋草矧爲異代民孺子髮亦皓銜哀撫弟棺淚若天池倒諸孤不成立教養待吾了脫身兵戈間又復喪而嫂鄉人勤慰藉酬答吻爲燥吾生留此眼及覩世變早垂老念衣食田舍且莫保旣夕出墓廬徘徊桑與稻流泉繞荒壠羣峯插蒼昊

重至蘇州夜宿漚尹聽楓園賦呈一律並簡大鶴

閶門柳色最淒清夢逐吳鴻復此行秋去隔年循短巷市荒入夜似山城幾人白袂能終臥二老黃巾了不驚還向萬蟲聲裏坐薄雲潮擁月微明

信宿金山下曹氏園用東坡金山寺涼字韻答眞長

東皋盤散月孤涼分領僧徒下舍香風露入秋侵坐冽莎蟲專
夜織愁忙得安短榻依初地無住疏鐘出上方獨有沈哀勞夢
寐與君商酌到微茫

自泰安入濟南車行泰山谷道間日晡始盡得詩四十韻
載馳入青徐莽莽千里原高厚浩然氣積此時一尊羣壤營大
聚億簣皆東屯壯哉國有枳翳爾山之樊衢陌勢開張塔寺姿
昂軒行賈頗充物負鸞亦囂喧買致一拳松胎彼千歲根玄冬
雖凜凜物色自溫溫少焉及谷口仰止惟崇垣方駕銜首尾衡
輒相鉤援飭飽厲去鷹蹄疾追放豚流覽駭萬象回顧愕精魂
稍卻修嶂迴復逼層巒嶓或翼禽奮張或骨獸猛蹲或鱗髯而
磔或介首而髡神房翁縹緲仙閨女嬋媛嵌空冰雪白俯海雲
霧翻想見臨日觀曾可呼天闔昔者聞父詔於茲參化元披衣

立頂石夜半明朝瞰機綜何冥合宙宇彌吐吞匪惟魯所詹直
以震爲門開闔電一瞥圖畫視久存三古世不遠六合難具論
我今賦北征所歷得微暄但欣乘櫺過未獲磨崖捫緬往多附
麗何者鑒批根視精隆璧請德至升柴燔豈謂神祇荒將令黃
兒蕃銘策易磨滅政轍誠儉昏等之禍福極而况事物繁哲人
戒躋埤仁者心動旛神來滿坑谷意往平恩冤未能萬蟲負乃
馭六馬奔斗杓誰與齊落日不留痕坂幽平者陂壑暝清而渾
星光出隙罅黛色終眇暗杯莫薄魯酒媒敢告齊婚平生喜兀
岸茲游開鈍惛崇高不自伐胸中難狀言

旣除婦服哀不能盡詩以道之

世間候再寒地下亦一年登丘望落日夕夕沈虞淵斯人好顏
色一往不留妍我非金石軀在理無獨全始喪恍暫別疑君便

當還魂魄逝益遠夢寐眼將穿兒女如雁行幼者及長肩長大
母不見但在阿父邊攜兒往野哭野老嗤我顛顛亦莫自持知
且不謂然誰能剖胸臆告使陌路憐歲週服旣除日久境必遷
肺肝習悲酸奈非藥可痊入夜朔風凜缺月空中懸風凜有時
溫月缺有時圓惟人生死際破碎不復全

移居父埭角口占

吾聞鳥擇木未聞木擇鳥得樹三百株巢居不爲小

壬子除夕

屠蘇杯在手此歲遂除畢豈惟一歲除吾年亦除一壬子溯庚
子追論至戊戌駸駸十五年頗已懼今日吹灰弄葭管舉世弗
中律何從尋好春到我寫詩筆

次韻答眞長